
प्रमुख समाचार –

- भगवान बिरसा मुंडा के जयंती के मउका म मुख्यमंत्री ह आज रईपुर म दू दिवसीय जनजातीय गौरव दिवस अउ अंतर्राज्यीय आदिवासी लोकनृत्य महोत्सव के सुभारंभ करीन।
- प्रदेश म समर्थन मूल्य म धान खरीदी आज ले सुरु होंगे हे।
- मुख्यमंत्री आज संज्ञा नवा रईपुर म राज्य के नई औद्योगिक विकास नीति दू हजार चौबीस-तीस के करही विमोचन।

मुख्यमंत्री-जनजातीय गौरव दिवस

भगवान बिरसा मुंडा के एक सौ पचासवां जयंती के मउका म मुख्यमंत्री विष्णुदेव साय ह आज रईपुर के साईस कॉलेज मैदान म दू दिवसीय जनजातीय गौरव दिवस अउ अंतर्राज्यीय आदिवासी लोकनृत्य महोत्सव के सुभारंभ करीन। कारीकरम के सुभारंभ अवसर म इक्कीस राज्य के आदिवासी नर्तक दल के कलाकार मन ह आकर्षक मार्चपास्ट करीन। ए मउका म मुख्यमंत्री ह किहीन कि छत्तीसगढ़ म जनजातीय गौरव दिवस के सुरुआत जशपुर ले हो चुके हे। ओमन किहीन कि पीएम जनमन योजना के तहत बिससे पिछड़ा जनजातीय समुदाय के गांव मन म बुनियादी सुविधा के विकास होवत हे। केंद्र सरकार डहार ले आदिवासी गांव के समग्र विकास बर धतरी आबा जनजातीय ग्राम उत्कर्ष अभियान सुरु करे गेहे। एखर बर अस्सी हजार करोड़ रुपिया के प्रावधान करे हे। एखर छत्तीसगढ़ के छै हजार छै सौ इंक्यानवे आदिवासी गांव म बुनियादी सुविधा के विकास अउ जनजातीय समुदाय के कल्याण के काम होही। ए राज्य स्तरीय कारीकरम के तहत दू दिन तक आने-आने बिसय म संगोष्ठी, जनजातीय चित्रकला प्रदर्शनी के संगेसंग देस के इक्कीस राज्य के अट्ठाईस आदिवासी नर्तक दल सांस्कृतिक कारीकरम के प्रस्तुति दीही। राज्यपाल रमेन डेका अउ मुख्यमंत्री विष्णुदेव साय ह जनजातीय गौरव दिवस के मउका म समुदाय अउ प्रदेशवासी मन ल सुभकामना दीन हे। पीएम जनमन अउ “धरती आबा जनजातीय ग्राम उत्कर्ष अभियान” के तहत ग्राम, विकास खंड अउ जिला स्तर म योजना मनके प्रचार-प्रसार के संगेसंग काली पंद्रह ले छब्बीस नवंबर तक सबो चिन्हारी करे गांव मन म बिससे ग्रामसभा के आयोजन करे जाही।

धान खरीदी

प्रदेश म समर्थन मूल्य म धान खरीदी आज ले सुरु होंगे हे। मुख्यमंत्री विष्णुदेव साय ह बालोद जिला के गुण्डरदेही विकासखंड के भाटागांव ले धान खरीदी के सुभारंभ करीन। ए मउका म ओमन ह किसान मन ले खरीदी केंद्र मन म मिलत सुविधा के जानकारी लीन। मुख्यमंत्री ह किहीन कि ए बखत सत्ताईस लाख ले जादा किसान मन ह धान बेचे बर पंजीयन कराय हे। सरकार डहार ले धान के भुगतान बहत्तर घंटा के अंदर सुनिश्चित करे जाही। ओमन किहीन कि दू हजार सात सौ ले जादा उपार्जन केंद्र मनके माध्यम ले धान खरीदी करे जाही। धान खरीदी बर सबो उपार्जन केंद्र म बायोमेट्रिक डिवाइस के व्यवस्था करे गेहे। लघु अउ सीमांत किसान मन ल अधिकतम दू टोकन अउ बड़का किसान मन ल तीन टोकन के पात्रता होही। खरीदी केंद्र ले धान के उठाव मिलर अउ परिवहन कर्ता के माध्यम ले कराय के निरदेस दे गेहे। सबो खरीदी केंद्र म बारदाना के उपलब्धता के संग किसान मन बर सेड अउ पानी के व्यवस्था घलो करे गेहे।

नई औद्योगिक विकास नीति

मुख्यमंत्री विष्णुदेव साय आज संज्ञा नवा रईपुर म आयोजित कारीकरम म राज्य के नई औद्योगिक विकास नीति दू हजार चौबीस-तीस के विमोचन करही। कारीकरम के अध्यक्षता उद्योग मंत्री लखन लाल देवांगन करही। नई औद्योगिक नीति ल उद्योग विभाग डहार ले संबंधित सबो हितपक्ष, औद्योगिक संगठन, औद्योगिक समूह, संबंधित विभाग मनके संग संवाद अउ विचार विमर्स कर तियार करे गेहे। खबर के मुताबिक बीते अट्ठाईस अक्टूबर के होय राज्य मंत्रिमंडल के बइठका म नई औद्योगिक विकास नीति ल मंजूरी दे गे रिहीस। ए नीति म छत्तीसगढ़ सरकार ह भारत सरकार के वीजन दू हजार सैंतालिस के परिकल्पना ल साकार करे अउ राज्य के औद्योगिक विकास ल गति देके उद्देश्य ले कतकोन प्रावधान करे हे।

उपचुनाव-ईव्हीएम सील

रईपुर नगर दक्षिण विधानसभा उपचुनाव बर काली मतदान पूरा होइस। आकाशवाणी समाचार ले गोठबाट करत रईपुर के जिला उप निर्वाचन अधिकारी उमाशंकर बंदे ह बतइन कि मतदान के बाद सबो इलेक्ट्रानिक वोटिंग मसीन ल सेजबहार स्थित शासकीय इंजीनियरिंग कॉलेज म बनाय गे स्ट्रांग रूम म सील कर दे गेहे। स्ट्रांग रूम ल मतगणना के दिन तेईस नवंबर के खोले जाही। श्री बंदे ह बतइन कि ए उपचुनाव म पचास दसमलव पांच सून्य प्रतिसत लोगन ह वोट डाले हे।

विमान-लैंडिंग

नागपुर ले कलकत्ता बर उड़ान भर चुके इंडिगो विमान के आज रईपुर के स्वामी विवेकानंद एयरपोर्ट म एमरजेंसी लैंडिंग कराय गीस। ए विमान म एक सौ सत्यासी यात्री अउ करीबन छै क्रू मेंबर सवार रिहीन। खबर के मुताबिक नागपुर पुलिस ल ए विमान म बम होय के सूचना मिले रिहीस। एयरपोर्ट प्रबंधन डहार ले राडार म फ्लाइट के लोकेसन के पता लगाय गीस। ओ समय इंडिगो के विमान बर रईपुर विमान तल सबले तीर रिहीस। विमान के लैंडिंग के बारे म रईपुर एयरपोर्ट अधिकारी मनले चर्चा करे गीस अउ इमरजेंसी लैंडिंग के सूचना रईपुर के एयरपोर्ट प्रबंधन ह पुलिस ल दीन। एखर बाद वरिष्ठ पुलिस अधीक्षक संतोष सिंह के निरदेस म सीआईएसएफ अउ पुलिस के जवान मन ह विमान ल सुरक्षा घेरा म ले लीस। एखर बाद सबो एक सौ सत्यासी यात्री मन ल विमान ले बाहिर निकाल के तलासी ले गीस। सीएसपी लंबोदर पटेल अउ टीआई भावेश गौतम ह बतइन कि जांच के दउरान विमान म कोनो भी विस्फोटक या संदिग्ध वस्तु नइ पाय गीस। यात्री अनिमेष मंडल डहार ले विमान म विस्फोटक सामग्री अउ फ्लाइट क्रेस हो जाय के गलत सूचना दे के आरोप म पुलिस ह ओला गिरफ्तार कर न्यायालय म प्रस्तुत करीन। बताय जात हे कि आरोपी नागपुर के रहइया हरय।

निकाय चुनाव बैठक

राज्य निर्वाचन आयुक्त अजय सिंह ह स्थानीय निकाय चुनाव के तियारी ल लेके वीडियो कॉन्फ्रेंसिंग के माध्यम ले जिला निर्वाचन अधिकारी मनके बइठका लीन। ओमन ह चुनाव प्रक्रिया ल सुचारू अउ निष्पक्ष ढंग ले संचालित करे बर दिसा-निरदेस जारी करीन। बइठका म आने-आने बिंदु उपर बिस्तार ले चर्चा करे गीस। जेखर ले चुनाव प्रक्रिया बेरा म पूरा करे जा सकय। राज्य निर्वाचन आयुक्त ह जिला निर्वाचन अधिकारी मन ल निर्वाचन नामावली म कोनो भी तरह के त्रुटि ल दूरिहा करे के निरदेस दीन। जेखर ले हर योग्य मतदाता के नाम सूची म सामिल हो सकय। ओमन किहीन कि एक अक्टूबर दू हजार चौबीस के स्थिति म अटठारा बछर के आयु पूरा करइया मतदाता मनके नाव सूची म सामिल करे जाय। राज्य निर्वाचन आयुक्त ह चुनाव प्रक्रिया के सही संचालन बर योग्य अउ प्रसिक्षित कर्मी मन के नियुक्ति करे बर किहीन। संगेसंग बइठका म निर्वाचन सामग्री के व्यवस्था, सामग्री के गुणवत्ता, बजट आबंटन अउ आवश्यकता मन उपर घलो बिचार विमर्स करे गीस।

दुर्घटना

बस्तर जिला के किलेपाल क्षेत्र म आज बिहनिया एम्बुलेंस अउ ट्रक के बीच होय टक्कर म एम्बुलेंस सवार दू मेडिकल स्टाफ के मउका म ही मउत होगे। उहें, छै आने लोगन घायल होगे हे। घायल मनके इलाज बर डिमरापाल स्थित मेडिकल कॉलेज म भर्ती कराय गेहे। खबर के मुताबिक ए एम्बुलेंस किरंदुल स्थित एनएमडीसी अस्पताल ले एक मरीज ल लेके रईपुर मेडिकल कॉलेज आवत रिहीस। एम्बुलेंस म आठ लोगन सवार रिहीस। ए दउरान कोडेनार थाना क्षेत्र के अंतर्गत ए हादसा होगे। ओति, गरियाबंद जिला म बीते रात ड्यूटी के बाद देवभोग वापस लहुटत बेरा एसडीएम तुलसी दास मरकाम के गाड़ी अनियंत्रित होके धवलपुर नाला के तीर पलट गे। ए घटना म एसडीएम अउ तहसीलदार विजय सिंह ल थोरकुल लागे हे। उहें, गाड़ी बुरा तरह ले क्षतिग्रस्त होगे हे।

एशियन थाई बॉक्सिंग चैंपियनशिप

गोवा म काली ले आयोजित होवइया एशियन थाई बॉक्सिंग चैंपियनशिप म छत्तीसगढ़ के नौ खिलाड़ी घलो भाग लिही। एमा दंतेवाड़ा जिला के पांच खिलाड़ी सामिल हे। ए पांचो खिलाड़ी ह काठमांडू म आयोजित साउथ एशियन चैंपियनशिप म भाग ले रिहीस। जेमा चार खिलाड़ी मन ह स्वर्ण अउ एक खिलाड़ी ह रजत पदक जीते रिहीस। ए खिलाड़ी मनके चयन थाई बॉक्सिंग इंडिया नेसनल चैंपियनशिप म उंखर अच्छा प्रदर्शन अउ थाई बॉक्सिंग इंडिया फेडरेशन के दिसा निरदेस के आधार म करे गेहे।

मौसम

प्रदेस के वातावरण म नमी के मात्रा धीरे-धीरे कम होवत हे। जेखर सेति न्यूनतम तापमान म मामूली गिरावट होवत हे। सोलह नवंबर ले न्यूनतम तापमान म कमी होही अउ ठंड बाड़ही।
